

Anavos ellas muntognas

Il Grischun sefatschenta danovamein culs giugs olimpics d'unviern

DA GIUSEP VENZIN / ANR

■ **La Svizra siemia danovamein dils giugs olimpics d'unviern ed il Grischun gioga en quels siemis ina rolla centrala. Cun Tavau e S. Murezi seposiziuneschan dus loghens turistics cun vasta infrastruttura turistica e da sport.** S. Murezi ei stau 1924 organisatur dils emprems giugs olimpics d'unviern e 1948 organisatur dils emprems giugs d'unviern sunter la Secunda uiara mundiala. Quels giugs ein daventai ils davos decennis gigantics. Sulet per la candidatura impundan ils interessents 30 milliuns e dapli. Sion ha candidau sco davosa destinaziun svizra pils giugs olimpics d'unviern ed ha spiars la lutga 1999 encunter Turin. Ina candidatura grischuna pils giugs 2010 ha gia fatg naufragi encunter la candidatura da Berna/Montreux. Pli tard ha il pievel bernes snegau il credit per finanzia la candidatura. Ina candidatura da Tavau/Turitg 2014 ei ida dall'aua giu per munconza da curascha da Turitg.

Alla riva dalla Mar nera

Ils davos decennis ein ils giugs olimpics daventai pli e pli gigantics e 2014 duei quei buc esser auter. Sunter Turin 2006 e Vancouver 2010 ei Sotschi en roda ed igl anteriur president ed actual premminister russ *Wladimir Putin* ei il promotur dils giugs alla riva dalla Mar nera. Pils giugs en biebeen treis onns duei l'entira infrastruttura vegnir realisada da niev. Sotschi ei la stad il liug da vacanzas tschercau dils Russ beinstonts, igl unviern ein denton strusch turists el marcau cun palmas e temperaturas migeivlas entuorn 10 grads igl unviern. Avon treis onns ei Putin era staus presents al Congress olimpic internaziunal a Guatemala tier la surdada dils giugs. Sco ils giugs olimpics ein carschi ein era las expensas per la segirtad da quels giugs carschidas. Vancou-



L'organisaziun dils giugs olimpics d'unviern ei puspei in tema el Grischun. Quei duei denton mo succeder sch'il Comitè olimpic internaziunal po frenar il gigantissem dils giugs dils davos decennis.

MAD

ver haveva previu entuorn 200 milliuns per la segirtad, custau ha quella alla fin bunamein ina milliarda. Sotschi quenta cun expensas totalas da rodond 14 milliardas pils giugs olimpics d'unviern 2014.

Giugs pli mudests el Grischun

Giugs olimpics el Grischun duein denton daventar in bionton pli mudests. Quei ha il cusseglier guvernativ *Hansjörg Trachsel* detg sin damonda. El ha denton buca vuliu risdar da giugs olim-

pics grischuns, mobein giugs cul Grischun el center. Las staziuns da sport Tavau, S. Murezi, Laax/Flem e Lai/Valbella han mussau interess e sin fundament da quei hagi il Grischun contactau igl uost Swiss Olympic. La davosa fin d'jamna ha Swiss Olympic discutau ils plans a caschun d'ina dieta a Magglingen ed ad Ittigen el cantun Berna. Il cusseglier guvernativ ed anteriur bobist ei era staus involvaus ella candidatura pils giugs olimpics d'unviern 2010.

L'idea da candidar ina ulteriura ga pils giugs olimpics deriva da *Tarzius Cavigel*. Sin fundament da discors cun *Gian Franco Kasper* e *René Fassel* – il president dalla Federaziun internaziunala da skis e dalla Federaziun internaziunala da hockey sin glatsch – ei il cusseglier naziunal da Tavau sedumandaus l'entschatta zercladur sche la Svizra seigi insomma habla d'organisar ils giugs olimpics d'unviern e sch'il cussegl federal sustegni era ina tala candidatura. L'entschatta settember ha il

cussegl federal rispundiu che la Svizra seigi, tut tenor tgei pretensiuns, habla da far quei. El giavischi denton ch'il Comitè olimpic internaziunal tschent novs accents e tuorni tier giugs olimpics ella cuntrada alpina. Il center dils giugs duegien buc in marcau ni ina aglomeraziun esser, mobein in center turistic ellas muntognas.

Infrastructura durabla

Culla pretensiun da turnar allas ragischs ei il cussegl federal buca persuls. Sco *Tarzius Cavigel* ha concediu vegni ina tala intenziun era discutada enteifer il Comitè olimpic internaziunal. Aunc 2007 ei quei denton buca stau il cass. Salzburg haveva presentau a Guatemala in concept pli mudest e cun expensas da biebeen treis milliardas, ha denton fatg naufragi encunter Putin e Sotschi.

In dils giavischs da *Tarzius Cavigel* ei ch'ins drovi pils giugs olimpics ellas muntognas aschi bia infrastruttura existenta sco pusseivel. El Grischun fussi quei entuorn 60%. Il cusseglier cun ragischs sursilvanas ha menziunau Lillehammer en Norvegia. El liug dils giugs olimpics 1994 vegni l'infrastructura aunc duvrada per la pli gronda part. *Tarzius Cavigel* ha era dumandau il cussegl federal schebein investiziuns el traffic public pudesen vegnir preferidas per cass che la Svizra vegni risguardada sco organisatur da giugs olimpics. Era quei fuss il cass, aschi ditg ch'ils projects ein concrets.

En scadin cass giavischa *Tarzius Cavigel* negina nova candidatura cun Turitg. «Per mei muntass quei buca turnar allas ragischs.» Tenor il cusseglier naziunal ston ussa las persunas ed organisaziuns preparar ina nova candidatura per mauns da Swiss Olympic. Ina emprema candidatura sin palancau fuss pusseivla igl onn 2015 – pils giugs olimpics igl onn 2022.

Collaboraziun cun Falera-Laax secumprova

Dapi 5 onns prosperescha la stizun dil vitg da Sagogn

■ **Dapi vendergis vargau ston ils da Sagogn buca pli desister d'ina impurtanta part da lur infrastruttura. Pervia dalla renovaziun interna che ha cuzzau treis jamnas ei la stizun dil vitg stada serrada diltut. Vendergis vargau ha giu liug la reavertura.** Ch'ins hagi schau encrescher per la stizun han las vendidras udiu biaras gadas il vendergis e la sonda el decuors dil gi. Che la stizun dil vitg ha veramein muncau als da Sagogn ha ins era s'encurschiu duront quels dus gis da reavertura. Sunter che la stizun renovada era s'aviarta danovamein il vendergis endamaun ha la menadra *Anna Maria Welter-Cavelti* saviu surdar gia la sonda avonmiezgi a *Ruth Haag* in bon ella valeta da 100 francs. La habitonta da Sagogn ha giu il cletg dad esser la 500avla clienta alla cassa dalla stizun nova. Duront ils dus gis da reavertura han biars demussau lur plascher ch'il vitg dispona d'ina atgna stizun. Ils ins ein vegni en stizun per meraviglia, la gronda part denton perquei ch'els han strusch saviu spitgar silla reavertura. Quei secapescha buca da sesez, schai Sagogn gie buca lunsch naven dil center commercial da Glion cun sias stizuns grondas.

L'impurtonza che la stizun dil vitg gauda ha era il president communal *Flurin Panier* concediu en siu plaid da beinvegni la gievgia sera a caschun digl aperitiv per hosps ed envidai. El ha dau

ina retrospectiva ed ha rendiu attent ad in secund motiv da fiasta, sper quel dalla reavertura: Ils 23 da november 2005 haveva el priu part el medem liug dalla reavertura sut la direziun dall'Associaziun da consum Falera-Laax. Per accen-

tuar il pign giubileum ha *Flurin Panier* dau in sguard ella cuorta historia da quella collaboraziun prospereivla. Ils 9 da mars 2005 haveva la firma *Lagrischa SA* annunziau alla populaziun ch'ella vegni a serrar sia filiala, e quei era suc-

cediu gia treis gis pli tard, ils 12 da mars. La populaziun e las autoritads ein stadas avon fatgs cumpleni. Silsunter ha ina gruppa da lavur immediat priu a mauns activamein la caussa, pertgei la suprastanza haveva signalisau sia prom-

tadad da cooperar per anflar sliagiuziuns. Sunter liungas retschercas e contractivas eis ei reussiu d'anflar ell'Associaziun da consum Falera-Laax ina nova purtadra dalla stizun. La vischnaunca haveva garantiu da sorprendre il tscheins d'affittaziun per las localitads da vendita ella casa *Mira il Plaun*. Ei era vegniu fixau dad arver la stizun per in temps d'emprova da 2 onns.

Igl ei semussau che la necessitad d'ina stizun ei dada, pertgei l'Associaziun da consum Falera-Laax ha saviu dublegiar la sviulta da sia filiala Sagogn dapi il november 2005. Che la menadra *Anna Maria Welter-Cavelti* e sias vendidras indigenas han grond merit da quei grond success ha era il president dall'Associaziun da consum Falera-Laax, *Christian Capaul*, dau d'entellir. El ha gratulau alla vischnaunca ed a sia populaziun pigl engaschi per la stizun dil vitg ed ei semussau plein speranza che quella filiala hagi aunc bia potenzial e vegni a survir a liunga vesta alla populaziun da Sagogn. Il matg 2008 haveva la radunanza communal approbau in credit da cumpra per las localitads ed il fenadur dil medem onn ha la suprastanza saviu signar il contract da cumpra culla firma *Lagrischa*. Ina renovaziun exteriura dalla casa ed ussa la renovaziun interna dalla stizun dattan ina certa garanzia per in bien avegnir dalla stizun da Sagogn.



Selegnan dil prosperar dalla stizun dil vitg: *Anna Maria Welter-Cavelti* cul president dall'Associaziun da consum Falera-Laax, *Christian Capaul* (enamiez) ed il president communal *Flurin Panier*.

FOTO A. BEELI

Augustin Beeli